



Selasa, 26 Nopember 2024

Ogen : Heber 13:1-4



Ngergaken Perjabun



Jabu kalak Kristen e me gambaren perpulungen singikutken Kristus. Jabu e min tetap teridah ndalanken si ngena ate Dibata. Jabu kalak Kristen e erkade-kade, lit senina ras turangna. Sehkenlah kekelengen man senina ras turang bage pe man sangkep geluh. Mediate erturang ras ersenina, lit kekelengen ras nggeluh si sampat-sampaten. Mediate pe man teman sebaleng (sejiran), dinging metemue. Lit pengajaren si idat kita i bas ay. 2. Asum ialo-alona kalak kesilang ku rumahna, alu la ietehna enggo ialo-alona malaikat. Tuhu-tuhu iarapkan jabu kalak Kristen e metemue, nggit nangtangi perbeben teman, mereken kecukupenna guna nerusken perdalinenna. Tole nari jabu kalak Kristen e pe kepate nandangi teman si lit i bas penjara, nggit nampati guna mulahi perbebenna. Bas kita nggit nampati, i je ka nge pasu-pasu e.

Adi hubungenta ku darat mejile, arusna jilen hubungenta ku bas jabunta, man anak ras perbulangenta. Kususna ras perbulangen. I bas ay. 4 ituriken, ngergaken perjabun. Siniarapkan i je kita setia man perbulangen. Dem kekelengen ras kehamaten. I je me situduhkan biakta si jujur, bersih ukur, lit keterbukan, lit pengorbanen ras tetap min ersada arih. Istilah si gundari 'selingkuh,' 'pelakor' e ndauh min i bas kita nari. Si tatap perbulangenta, pilihenta si enggo ipasu-pasu Tuhan. Sinen si mehuli i bas dirina si erbahansa kita erngena ate man bana, e si pebelin i bas pushuta nambur-namburi kekurangenna. Siergaken ia i bas keterbatasenna, si ulih-ulih nuriken ateta ngena man bana, gelah ia pe ertambahna semangatna engkelengi jabunta. Sibaba tetap ku bas pertoton gelah megegeh jabunta encibalken keleng ate ku sekelewetta.